

Da mer hür z`3. höch Jubiläum händ han ich mer gseit ich wett  
das eusi Fasnacht gross e de Schlagziele chonnt so das mer lang no dröber redt  
dromm brüchti jetz ein vom Kulturverein wo sech ned tuet schiniere  
ond eifach so tät als wördi er de Helge met Urin markiere

Wo de Papscht ed Schwyz esch cho frog ich en wohnen gseh  
du Päuli wiso esch dis Papamobil eigentlech met Glas omgeh  
jo weisch das esch e reini Vorsechtmassnahm duet er mer entgägne  
fö de Fall dasi onderwägs seti em Alex Frei begägne

Em Dütsche osse düend d`Schiedsrechter ond au d`Fuesballspeler wette  
welli Mannschafte das gönne müend ond welli das verlüüre sette  
ond jetz hani ghört du be eus er Schwyz heiges au scho met wette aagfange  
welli Mannschafte tschutte em Frühlig no ond welli send konkurs gange

Wenn d`Kassierin em Migro es Chopftuech treit do hani doch nüt degäge  
Problem hani aber den demet wenn si afoht komisch tue deswäge  
do seit doch sone Kassierin zo mer em Migro onde z`Brogg  
äntwäder gönzi jetz ane anderi Kasse oder düend s`Schwiensfleisch weder zrog

Wohni chörzlech z`Brogg onde wot es Poschtauto iestiege  
do foht for mer ein a es Näscht ond en Wohnwand en Bus iebiege  
wohner den no en Tesch bringt ond 4 Stüehl do frog ich en ganz kess  
dörfi drüü mol rote sie send eine vom Vcs

Er onde do em Städtli Brogg hani ghört düeged lamentiere  
well`me euche Stötzpunkt düeg zonere Dorffüürwehr degradiere  
er fänded das e Schweinerey ond siged total fruschtriert  
gsänder jetz das chonnt devo wemmer met Umike fusioniert

Chörzlech ghöri em Zentrom Lee wiene en alti Frau duet bäte  
Hergott wiso trett de Item Manfred zrog er esch doch so en nätte  
drofabe hani die Frau den tröschtet es bringt jetz nüt wend weinisch  
well trett euse Gmeindamme s`erscht mol zrog denn chonnt er ame no einisch

Es Seifecheschterenne en Rinike jo das fend ich de Hit  
ond ich ha de Plausch das es e eusem Dorf no inovativi Persone git  
nor müessti mer jetz no das Ganzi do met eme geile Name benenne  
ond do hät ich doch au scho en Vorschlag we wärs met Lauperhornrenne

Damet de Gmeirot weniger Aerger hät wörd ich ehn gärn bitte  
mache mers z`Rinike doch we Schwyz Aktuell ond gönd zrog e Gotthälfs Zyte  
denn hätte mer no kei Starchstromleitig au de Chreisel miech eus ned betroffe  
jo ond jetze chonnt no de Besch de Hersche wäri no offe

Das me vo Röfenach ond Remige här nömm of Rinike ie cha rase  
boue mer jetz a de Dorfigäng so Ensle zmetzt ed Strasse  
das sig e sogenannti lfahrtsbräms wemer a de Gmei erfahrt  
oder wies of zöridütsch jetzt heisst die kröpfti Nordiifahrt

Min Jubiläumsuftrett esch jetz verbie dromm wetti euch no orientiere  
das mer jetz öpper gäg de Dorscht set e Fläsche Wodka spändiere  
ond han ich denn die Fläsche gleert sing ich dann russisch für die Rest  
ond gehe nächstes Jahr für die Schweiz an den Eurovision Song Contest

Also wer nach 20 Jahr Schnetzelbänk de Komedi wet witer erläbe  
de söll das doch bitte jetz bezüege dor Hand erhäbe  
doch er wärded secher Verständniss ha wenn ich of die Abstemmig pffife  
well secher wede er gendein s`Referändom werd ergriffe

*Der Komedi<sup>05</sup>*

Wänd er me bsueche? Ich be dehei onder „[www.komedi.ch](http://www.komedi.ch)“

Em Ulrich Gygi sini Poscht die chonnt ned zor Rue  
me streickt ond me stricht Arbeitsplätz ond me macht Poschtstelle zue  
jo chönntis sogar mögli si das si au eusi Poscht iespare  
ha nor tänkt well euse Poschthalter jetz no afoht Taxi fahre

Woni d`Chöschte gseh ha vom Strossebou frog i de Item voller entsetze  
du Manfred müemmer em Onderdorf wörkli all Wasserleitige ersetze  
jo seit de Manfred das muess leider si die Leitige gsänd schlächt us  
sosch hämmer plötzli glich vell Wasserfontäne wie die z`Bärn vorem Bondeshus

Ich wäri denn nome so zom säge wenn's öpper intressiert  
de Löli wo zom Jubiläom d`Mählsoppe offeriert